

ABASI ADA YE OWO ESIE: ADA-USUÑ ISRAEL

Numbers 17:1-13

ỌYỌHỌ UKPEP-ŃKPO 106

Eke Mkparawa

IKỌ IBUOT: "Mme ikpe Jehovah edi akpanikọ, kpukpru mmọ enen" (Psalm 19:9).

Ndiyarade ẸkpọẸwut Owo Eyighe

Abasi ke ofuri ini onyinyime ndiyarade Idem Esie ye Uduak Esie nno owo emi eyikde ke esit akpanikọ. Ke ukpep-ńkpọ nnyin emi ebede, ima ikot nte Enye akanamde isọń asiaha emen Korah, Dathan, ye Abiram; ye nte ikań okotode Abasi osobo mbọń 250 emi mikekponoke idaha-odudu Moses ye Aaron. Ẹko, idiok udọńọ ama osobo ediwak tosin owo emi ekesukde mme ada-usuń Israel uyo. Ẹko, Abasi okosuk ebebeńe idem ndinọ idiọńọ efen man ọsọńọ idaha Moses nte ada usuń, ye odudu Aaron, kpa nsinsi idiọńọ emi anade nte ńkpọ editi ke ini ke ini.

Abasi ọkọdọhọ Moses ete anam mbọń kiet kiet ke esien Israel duopeba eda esań, mme ńkọk eto eke minyeneke ikọń esok enye; ndien yak enye Moses ada esań duopeba emi oduk ke Ata Edisana ebiet onyũ onim mmọ ke iso Ekebe emi ekesinde Mbet Duop. Etie nte ema ayak Moses oduk ke Ata Edisana Ebiet ke ediwak ini, okposuk edi nte akwa oku ekenyenede ndiduk ini kiet kpọt ke isua, ndien edi mi ke Abasi ekesitie "ke ufọt mme cherubim iba" etiń ikọ ye Moses (Exodus 25:22; 30:6; Numbers 7:89).

Akana nte ewet enyiń owo kiet ke ibuoť esien kiet kiet ke idem esań oro, man eyighe okodu ke abańa andinyene esań. Ekenyene ndiwet enyiń Aaron ke esań eke esien Levi.

Esehe ke Okoneyo Kiet

Ẹkpọ emi akananam mitibeke akana otibe ọńọ kiet ke otu mme esań emi. Kpukpru mme ndọńọ ńkọk-eto emi eketie ukem ukem ke adańemi Moses adade mmọ oduk ke Ataya, edi Abasi ama ọdọhọ ete ke esań kiet eyeseshe ke okoneyo oro. Mbio oro ema ekeme ndise esań oro ke idem mmọ, enyũ ekut enyiń eke ewetde ke enye. Ke usuń oro ke mmọ edidiọńo owo emi Abasi okponode nte akwa oku Israel.

Mme nya-nyańa esikọri usọp-usọp ekan mme eto efen, edi kpa ye oro mmọ isisiahake ikọń okoneyo kiet, inyũ ińwumke mfri ndomokiet. Mme esań emi ekedade enam udomo emi eketo eto mbansań mbakara, ndien Abasi ama ọńwọńọ ete ke mmọ idisiahake ikọń ikpọń, edi eyesiońo mfri ńko.

Akamba Afanikọń Ọwọp Oto Ke Ekpri Edisiońo-Ndo

Owo ekeme ndikpekere ete ke akpanikọ, mbio Israel eyetre ndisuk mme ada-usuń mmọ uyo edieke mmọ ekpetimde efiok idaha odudu mme ada-usuń emi. Ekedi ke ufọń Israel ke Abasi okoyom ete mmọ eyuhọ ke idaha mmọ, koro kpukpru ini eke mmọ esukde uyo, akamba afanikọń ekesitiene edem.

Ata esisit edisiońo ndo, ke abańa usuń nte enamde utom Ọbọń, me ekpri edikut ndudue nno mbọhiduń esie ekeme ndisin owo ke ata ntọtuńọ afańikọń. Ẹkpri ńkpọ esikọri. Ekpri edikut ndudue emi minenke ekeme ndikọri ńkabare ndi unana edinim ada-usuń esie ke akpanikọ; ndien ke adańemi erinim ke akpanikọ miduhe aba, ńkpọ efen iduhe eke anamde owo ada ke akpanikọ. Owo oro eyesọp okut ete ke ima Abasi ọmọwọp ọkpọń esit esie; ndien nte enye ọwọńọrede enyin ese mmọ eke ekande enye ekuk, eyetie nte enye ikemeke ndibuť idem ke baba owo kiet. Afanikọń oro odu ke esit esie, kpa nte Jesus adade ikọ obukpọk ye ekpri mbio anam ańwańa. "Nsinam afo esede ekpri mbio eke odude ke enyin eyen-ete fo, edi mukereke obukpọk oro odude fi ke enyin?" (Matthew 7:3). Ekpri mbio ekedi ata ekpri ńkpọ ke enyin owo enye eken, edi obukpọk oro ke enyin esie ama okpon tutu akpa owo idem nte enye akasańade okut ńkpọ. Ke ini nnyin ibọńde akam ibańa ńkpọ eke nnyin ikerede ite ifonke ke owo efen, edi se ikpade owo idem me owo oro ọfọń didie ke enyin nnyin; ndien ke usuń efen, ke ini nnyin isuhọrede ke idaha spirit, nnyin iyekut ite ke nnyin ikere ite ke ekpere ndidi kpukpru mmọ efen enam idiok-ńkpọ.

Mfri

Ke ini Moses odukde ke ata Edisana Ebiet ke usen-ubok edem usen oro, man ekemen mme esań oro, kpukpru mme eto oro ekesasat enyũ edi ukpọk, ibohọke enye emi ekewetde enyiń Aaron ke idem. Ikedighe enye ndikabare ndi awawa ikpọń, nnyũń nsiaha ikọń, edi kakpan, ama ońwum mfri mbansań mbakara. Ke okoneyo kiet!

Ke ini emi ofuri Israel ekedide ndise se ikotibede ye mme esań oro, sese nsat eto duopekiet ye enyiń mmọ emi ekedade ke ibuoť esien Reuben, Simeon, Judah, Issachar, Zebulun, Joseph, Benjamin, Dan, Asher, Gad, ye Naphtali,

nte ekewetde ke idem mmọ. Mmọ eketie kpasuk nte ke ini Moses akadade mmọ oduk ke Ataya. Edi se nte esañ Aaron eyede! Enye ama enyene awawa nsehe ikọñ, ye uto-uto flawa, ye mfri mbansañ mbakara ye mmem mmem ikpọk mmọ. Mmọ ema esiaha ke okoneyo, enyuñ eyama ke uyai mmọ nte etop emi Abasi ọdọñde ete ke Aaron edi akpan asaña-utom Imọ. Esañ Aaron ekedi ñkọk eke oñwumde mfri.

Eda Mfri Ediọñ

Ke Ukwọrọ-ikọ ke enyọñ Obot, Jesus anam añaña nte ekemedede ndidiọñ ata owo Abasi. Enye ọkọdọhọ ete, "Ntre ke mbufo edida mfri mmọ efiọk mmọ" (Matthew 7:20). Afo ekere ete mfri mmọ edi nso? Paul, owo-mbet ọdọhọ nnyin ete, "Mbuñwum spirit edi ima, ye idare-esit, ye emem, ye ime, ye mfonido, ye eti ido, ye erinam akpanikọ ye ifure-ifure ido ye mfara ke idem" (Nwede Mbon Galatia 5:22, 23). Kere se oro ọwọrọde ke uwem owo. Eyen Abasi emi oñwumde mfri enyene ima Abasi ke esit esie emi esinde enye ama mbọhọ-iduñ esie ukem nte idem esie. Jesus ama ọdọhọ ete ke enye eyema kpa idem mme asua esie. Idaresit odu ke esit esie kpa ke idem ini idomo. Enye idighe owo utọk, inamke itiene udọñ esit esiemọ; enye eyenyene anyan ime ke ini ñkpọ ọdiọkde; enye edi suñ-suñ, inamke owo ekededi ubiak, mme ndinam esit ọdiọk owo, edieke enye ekemedede ndinyaña; enye enyene nsuhoridem inyuñ idomoke ndiwut idem esie man owut mme owo nte enye enyenede ukeme ndinam mme ñkpọ. Oro edi owo eke oñwumde mfri edu uwem Anditiene Christ. Owo oro eye ke iso Jehovah ye ke iso ikọt Esie ñko, ukem nte esañ Aaron ekeyede uyai.

Ima Abasi ke uwem nnyin edi akpan ñkpọ akan mme utom eke nnyin ikemedede ndinam, ekpededi nte nnyin ikerede ite ke inam utom inọ Ọbọñ. Paul etiñọnọ nnyin ete mbuotidem nnyin ekeme ndikpon ñkem nte akpatde ikpọ obot, edi edieke ima Abasi ke esit nnyin ama akabare ebit, ididoroke nnyin baba ñkpọ kiet. Nnyin imekeme ndituk idem nnyin man inwam mme ubuene; edi edieke nnyin minyeneke ifiọk edimana obufa, nnyin inemke Jesus esit (I Nwede Corinth 13). Ke ini ema ekenyaña nnyin ke akpanikọ, nnyin inyuñ inyenede ima oro ke esit nnyin, mme utom eke inamde eyewut uyai edisana ido Esie.

Ekese Mfri

Ke ini esuk enyañade nnyin, nnyin idiñwumke ekese mfri spirit, edi imenyene ndusuk mmọ. Ekem nte nnyin isuk ikade iso iyom Ọbọñ, inyuñ iyakde esit ye uwem nnyin inọ Enye, Enye eyenọ nnyin ekese mfri. Ke ini Paul ekewetde ñwede ọnọ esọk mbon Philippi, enye ama ọdọhọ ete, "Ndien mmebeñe ntem nte, ima mbufo akpakam ọdọdiọñ awak ke ifiọk ye kpukpru ikike; man mbufo ekeme ndidomo mfiọk se ifonde ikan, kpañ mbufo edi mme anam akpanikọ ekunyuñ enyene ndudue tutu osim usen Christ; enyuñ eyọhọ ye mbuñwum eti ido, emi otode Jesus Christ; enọ Abasi ubọñ ye itoro" (Nwede Mbon Philippi 1:9-11). Nte ima emi nnyin imade Abasi ọkọride, ntre ke mbuñwum edinen ido ekọri, tutu eyọhọ nnyin.

Edomo Edinen Ido Aaron Ewut

Aaron ekedi asaña-utom akpanikọ ọnọ Abasi, ndien mfri emi okoñwumde ke esañ esie ama owut oro. Ema esin esañ Aaron ke Ekebe Ediom ọkọrọ ye Mbet Duop nte "idiọñ ọnọ mbon nsọñ ibuo." Abasi ọkọdọhọ ete "Afo edimen ofuri nsuk uyo mmọ ke iso Mi efep, mbak mmọ edikpaña."

Ndik ama anam mbio oro koro mmọ ema enyene ubiomikpe ke nsuk-uyo emi mmọ ekesukde Abasi ye owo Esie emi Enye ekeyetde aran. Okoto ke ntak idiọk-ñkpọ ke esit mmọ, mmọ ema eyom ndidaha ñkpọñ Ataya emi Abasi okodude. Abasi omoyom ikọt Esie efehe ndik mbak ediyat Enye esit, edi idighe utọ ndik eke edinamde mmọ efefehe ekpọñ Enye. Ndik eyenam nnyin itim ikpeme ndinam mme ñkpọ eke enemde Enye esit man idọdiọñ isik ikpere Enye ikan. Abasi omonim akwa utip ọnọ oruk ibon oro: "Ufọn Fo okpon didie emi Afo onimde ọnọ mmọ eke ebakde fi, onyuñ anamde ọnọ mmọ eke ebuotde idem mmọ ye afo ke iso nditọ owo!" (Psalm 31:19).

MME MBUME

1. Nso ikedi akpan ñkpọ ke ukpẹp-ñkpọ emi, eke Abasi ekenyenede ndisọñọ?
2. Didie ke Abasi ọkọdọhọ Moses anam?
3. Esañ ifañ ekedu do? Mmọ ekenyuñ enyene mme anie?
4. Enyiñ Aaron okodu ke ewe esañ?
5. Didie ke mme esañ ekenyene ukpẹhọre ke eyo esierede?
6. Nso ke esañ Aaron akayarade owut?
7. Nso idi mbuñwum spirit?